

■ VISEPENTE DI BASILIAN

Al torne il lunari di pre Toni Beline

Par cure di **Alida Pevere**, **Manuela Quaglia** e **Cristian Liberale** al torne di "Lunari di pre Toni Beline" ancje pal 2016. Sul teme de misericordie al met adun pinsirs e riflessions di pre Beline, mancjât tal Avrîl dal 2007. La presentazion e sarà fate sabide ai 7 di Novembar aes 4 dopomisdî a Visepente di Basilian in glesie.

Il Lunari al è un progjet di beneficence che al puarte indevant la iniziative di pre Toni di finanziâ la costruzion di poçs di aghe in Afriche: di fat curadôrs e colaboradôrs a son volontaris e lis ufierts cjapadis sù a son dal dut destinadis a cheste iniziative.

Il lunari si podarà cjatâlu in glesie a Visepente, te edicule "Curiosità" di Visepente, te cartolarie "Cartoltecnica" a Cjampfuarmit, tal bar-edicule "Ogni bene" di Basilian, tal bar "Masino" a Mels di Colorêt di Montalban, tal "Minimarket da Lidia" di Maian e intes glesiis di Vît e Clausêt.

SCOLTADIS DI DRIUS

Vie il vin

Il miedi: "Tunin, mi tocje cjoliti il vin" Grazie dotôr. Se no l'è masse disturb, une di blanc e une di neri.



Un biel premi al Ostîr



Raffaele Serafini

Il concurs leterari San Simon al è lât a **Raffaele Serafini** pe sô racuelte di contis che e met adun lidris e tradizions furlanis cun ispirazions che a rivin dal Gjapon.

» DI CHRISTIAN ROMANINI

Nassût tal 1975, al lavore tant che insegnant di dirit e economie ator pes scuelis superiôrs, tant che espert di furlan ator pes mediis, tant che sportelist di lenghe furlane ator pes bibliotechis; cognossût tal web tant che 'gelostellato', za 'Cil glaçât' di un timp e 'Salvadeat' di cumò, al trafiche spes cu la narrative curte, ma pai plui al è l'Ostîr di Contercurte (www.facebook.com/ostarieleterarie).

Raffaele Serafini di Sclaunic in Comun di Listize (Ud) al è il vincidôr dal premi leterari di Codroip 'San Simon 2015' cun 'Soreli jevât a mont', racuelte di contis che e met adun lidris e tradizion fur-

lanis cun ispirazions che a rivin dal Gjapon. Serafini no dome al à conquisât la jurie tecniche, ma ancje il parè de jurie popolâr che pe prime volte chest an e je stade clamade a esprimis.

Prin di dut congratulazions! Cuâl isal stât il prin pinsir cuant che tu âs sintût il to non?

"Ma... cjale, disin che lu ai sintût dopo che a vevin pandût la vitorie di une racuelte di contis, e la sorprese no je rivade di bot e sclop. Plui che altri il percors al stât: 'Ce figade, o ai vinçût San Simon! Ce figade, cu lis contis! Ce figade, contis di gjenar fantastic cun tant di dissens!' Insome...

la sodisfazion e je ancje par vè vinçût cuntun lavôr che al è ad implen significatîf de mê direzion e stîl di scriture".

Ce àno in comun Friûl e Gjapon sul plan de lenghe e de tradizion?

"Sul plan de lenghe, al è clâr, pòc e nuie a nivel grafic e linguistic, ma cuant che tu vâs a voltâ i haiku (forme poetiche gjaponesse componude dome di 3 viers, ndr) dal talian al furlan al è maraveôs viodi che la metriche, in fat di silabis, imediatece e sfumaduris e cjape di gnûf la magjie poetiche di chê gjaponesse. Al pâr che il furlan al vedi mantignût chei colors e chê espressivitât che la television e i media a àn robât al talian tai ultins cincuant agns. Un valôr di cjapâ cussience di lui. Sul plan de tradizion, invezit, si cjanin une vore di figuris che no son lontanis dai nestrîs sbilfs e des nestrîs aganis, jessint chê insome. Ae fin si sa, lis lidris a son simpri lis pôris dal om".

Cemût nassie cheste atenzion pal Gjapon?

"Cjale, jo o ai passion di ogni mostri, fantasime e bestie misteriose, soredut cuant che a jentrin tal folclôr dai popui. Ma achì o ai di dii grazie a **Luca Filipuzzi**, un gno ami che par colpe mè al à tacât parfin a studiâ il gjaponês e che al è l'autôr des piçulis descrizions sul Gjapon. Si podeve selzi ancje cualchi altri cosmologie, ma chê niponiche e je la plui cognossude e fantasiose, ancje se po dopo, intindinsi... ae fin il libri al cjacare dome di Friûl".



ilfriuli@ilfriuli.it

Euronews informa

20 mil euros de Provincie di Udin par cors di matematiche intensive par jentrâ ae Universitât

Govetto, "Une buine iniziative par frontâ il futûr percors academic"

La Provincie di Udin e met a disposizion 20 mil euros par finanziâ cors di matematiche che a judin i students a jentrâ aes Facoltâts di Economie, Inzegnarie e Architeture, Siencis matematichis, Informatiche e multimediâls de Universitât di Udin. L'impuart, insiem ai criteris pal bant indreçât a lis scuelis superiôrs, a son stâts fâts bogns de Zonte provinciâl su propueste dal assessôrs a la Istruzion Beppino Govetto. "La Provincie di Udin, e rinove chest finanziament fin di dâ une oportunitât in plui ai nestrîs students par vè une rese plui alte in matematiche, ven a stâi un bagai di cognossincis in plui, propedeutic al futûr percors academic. Chescj cors a vegnin fâts di diviers agns, davuelts da

lis scuelis superiôr su la fonde di une convenzion cun l'Ateneu di Udin, par disciplinâ i programs e lis modalitâts di realizacion des ativitâts didatichis formativis. Si trate di lezions che a judin a miorâ lis za otimis cognossincis dai nestrîs students che si metin in mostre tes garis nazionâl e internazionâl di matematiche. Risultâts di buine prospetive pai nestrîs fruts che a van incoragjâts cun gnovis pussibilitâts par infuârli la lôr formazion. Lis ecelencis a van sostignudis e sburtadis indevant e chescj cors a rapresentin une oportunitât impuartante". I cors intensifs di matematiche a àn come finchel di miorâ la preparazion di base dal student par dâi la pussibilitât di frecuentâ cun



profit i cors universitaris; preparâlu a frontâ lis provis previodudis de Universitât pe verifiche dai debits formatifs in ingrês; sostignî prin de ore, za intant dal ultin

an des scuelis superiôr, il test valit pal superament dal debit formatîf par jentrâ tai cors di laurea di caratar scientific e, indulà che il benefici si puedi meti in vore, jessi dispensâts dal paiament des tassis pal test di ingrês. Il bant al è stât mandât a duçj i istitûts dal teritori e publicât sul sît internet de Provincie (www.provincia.udine.it): lis domandis a àn di rivâ dongje al Servizi istruzion e Universitât de Provincie dentri dai 23 di Novembar. Destinataris, duncje, lis istituzions scolasticis statâls secondariis di secont grât logadis in provincie, che a saran clamadis a meti in vore cors fats di docents che a son dentri de plante organiche dal istitût, lant daûr dal program concuardât cui referents de discipline incargâts des Facoltât dulà che si tegnin i cors. Insom dai cors, che a laran indevant par 36 oris in dut, e sarà metude in calendari une prove scrite che si tignarà intune sede de Universitât: i students che a passaran la prove a varan sfrancjât il debit formatîf in matematiche te pratiche di iscrizion.